



Proklamation



zum Egerchinger' Narreclapf 2004

Naare vo n'Egerchenge

Ändlech isch es sowiit
Ab hüt herrscht d'Fasnachtszyyt

Der Schlüssel isch übergäh als Zeiche,
dass vo nun a wärde gstellt ganz angeri Weiche

Verbii isch es mit em Bürokratetum
Füre g'holt wärde alti Brüüch vom Altertum

Als Pirate döi mer hüür um d'Gasse schliiche
Verschrecke die arme wie au die riiche

Die nöchschte sächs Täg due ig euch regiere
Ond s'Naaretriibe grad wyyter a üüch delegiere.

Chömed verchleidet ond machet mit
Das bringt Stimmig ond isch absolut der hit

Uuf Mascht ond Schottbruch chan ig verzechte
Drom loset, was ig üüch due brechte

Wenn mer morn am morge am föifi met der Chesslete döi starte
Hoff eg, dass veli Lüüt met mer uuf e Startknall döi warte
Vo denn a goht's los met der närrischer Zyyt, mer send nümme
z'halte
Alls wird uf e Chopf gschteilt ond nüüt bliibt bem alte

Am Nomittag dürfe die chliine Piratinne ond Pirate ihre Kostüm
präsentiere
Wär weiss, wär vor ihne wird kapituliere.
Met der Guggemussig werd eg die Chliine go bsueche
ond due der schönschti Böög ussueche

Am Obe hei mer för die Grosse Beizefasnacht
Schnalled üüch es Kostüm um ond machet Betrieb bis es chracht

Am Fryytig mischet üüch am Chräeball unter d'Pirate-Meuti
Chömed cho tanze, legget e Maske a ond machet fetti Beuti

Was wär der Samschtig ohni Dorfumzug vo n'Egerchenge

Wo veli Gruppe öppis döi darbringe
Eg säge üüch, chömet cho luege
E soone Umzug, dä muesch go sueche
Aschliessend isch am Kindermaskenball no es huere fäscht
Der gsäit, es herrscht Betrieb i däm Piratenäscht
Well mer das Wort Müedigkeit ned döi könne
Hei mer z'obe i de Beize no es Rönne
Gugger ond Schnitzelbänkler, die muesst der cho lose
Velech esch üüch sit der letschte Fasnacht öppis I d'Hose

Am Sunntig begäh mer üüs i frömdi Gwässer nach Wolfwil
Mer umsegle d'Strosse ond zeige üüs vom Beschte Profil

Am Obe heisst es de Piratenacht, met ere Bar ond toller Musig
Döt chasch de tanze, potzduusig

Am Zyschtig isch a der Seniorefasnacht im Rütli e hölle Betrieb
ältere Seebäre ond Korsarinne trifft me dört alli uuf ei Hieb

Spöter goht's de i üüsem schöne Böög a Chrage
Abe g'fühert zur Mühli wird är met em Waage
Es letscht mol chöi mer de ihn no bestuune för hüür,
Bevor är sich uuflost im grosse Füür

Au die schönschti Zyyt het es Änd
Doch vorhär legget no einisch a üüchi Fasnachts-Gwänd
I de Beize isch de no einisch öppis los
D'Klikke chöme verbii, mache Betrieb, so richtig famos

Bevor ig miini Red due beände
Möchte ig no es grosses Dankeschön iiwände

Z'tue gits allerhand för Sache
Merci all dene wo zum Glinge öppis döi mache

Sigs aktiv, passiv oder gar finanziell
Eg due euch umarme, ganz speziell

Ig wünsche üüch es schöne Fasnachtszyyt
Üüche Andy I

Bevor mer jetzt no eis vo de Chräieschränzer döi ghöre
Gäbe mer ihne no e dicke Applaus, und zwar e volli Röhre

Am Narrechlappf ane zweutusignudvier

Andy I